

आकाशवाणी जयपुर-अजमेर
प्रादेशिक समाचार

दिनांक 05.11.2025

समय: 18.45 बजे

- प्रदेशभर मांय मतदाता सूचियां रो खास गहन पुनरीक्षण कार्यक्रम जारी-बीएलओ घर-घर सर्वे करने जाणकारी ले रिया है।
- बारां जिला री अंता विधानसभा सीट सारू उपचुनाव रो दिन नजदीक आवण रे साथे ही प्रचार जोर पकड़यो।
- राष्ट्र गीत वंदे मातरम् री 150वीं वर्षगांठ रे मौके भारतीय जनता पार्टी 7 नवम्बर ने देशभर मांय डेढ़ सौ ठोडां खास कार्यक्रम आयोजित करेला।
- गुरु नानक देव जी रे प्रकाश पर्व अर कार्तिक पूर्णिमा माथे आज प्रदेशभर मांय धार्मिक उमाव-पंचतीर्थ स्नान रे साथे पुष्कर मेळो पूरो व्हीयो।

000

प्रदेशभर मांय चाल रिया मतदाता सूचियां रा खास गहन पुनरीक्षण कार्यक्रम रे तैत घर-घर सर्वे करने जाणकारी हासिल करी जाए री है। बीएलओ कानी ऊं मतदातावां ऊं मिलने गणना प्रपत्र रो वितरण डेटा भेळा करण सारू करयो जावे। काले ऊं सरू व्हीया एसआईआर रे तैत पात्र मतदातावां ऊं नुवा रंगीन फोटो अर पूरा भर्या गणना प्रपत्र लेर अद्यतन मतदाता सूची रो डाटा तैयार कर्यो जावे। जनजातीय बाहूल डूंगरपुर जिला मांय एसआईआर रे तैत आज वाल्मिकी समाज रा लोगां री कॉलोनियां मांय बीएलओ दौरा करने जाणकारी ली। जिला कलेक्टर अंकित कुमार सिंह लोगां ऊं बीएलओ री मदद करण सारू अरज करी।

झुंझुनूं जिला रा कोई साढे 19 लाख मतदातावां रा सत्यापन ने लेर बीएलओ घर-घर पूग रिया है। जिला कलेक्टर डॉ. अरुण गर्ग बतायो के 4 दिसम्बर तांई चालण वाळा अभियान रे तैत सगळा पात्र मतदातावां ने सूची मांय जोड़ण री कोशिश करी जाएला। श्री गर्ग बतायो के मतदातावां री समस्यावां रा निपटारा सारू 1950 रे साथे ही स्थानीय हेल्पलाइन नम्बर ई सरू कर्या जाएला। कोटपूतली-बहरोड जिला कलेक्टर प्रियंका गोस्वामी मतदातावां ऊं अभियान मांय बत्ती ऊं बत्ती भागीदारी निभावण री अरज करी।

000

बारां जिला री अंता विधानसभा सीट सारू 11 नवम्बर ने होवण वाळा उपचुनाव रो दिन नजदीक आवण रे साथे ही प्रचार जोर पकड़ण लाग्यो है। ई सीट माथे रीत मुजब खास मुकाबलो भाजपा अर कांग्रेस रे बीचे है, जिण ने निर्दलीय उम्मीदवार नरेश मीणा त्रिकोणीय बना रिया है। भाजपा ई सीट माथे मोरपाल सुमन ने मैदान मांय उतार्यो है। वटे ई कांग्रेस पैली रा मंत्री प्रमोद जैन भाया माथे फेरु भरोसो जतायो है। म्हारा खबरनवीस बतायो के दोन्यू दलां रा केई ठावा नेता चुणाव मैदान मांय उम्मीदवारां सारू प्रचार मांय उतर चुक्या है।

000

रेलवे देश रा सौ साल ऊं पुराना ठेशनां रो शताब्दी जळसो मनावेला। देश मांय रेल सेवा सरू होवण रे कोई पौने दो सौ साल पूरा होवण माथे विरासत सहेजण रा मकसद ऊं ओ कदम उठायी ज्यो है। ई कड़ी मांय बीकानेर रेलवे ठेशन माथे 7 नवम्बर ने महोत्सव मनायो जाएला। उत्तर पश्चिम रेलवे रा मुख्य जनसंपर्क

अहलकार शशि किरण बतायो के 13 नवम्बर ताई चालण वाळा ई आयोजन रे दौरान ठेसन रा विकास ने दरसावण वाळी नुमाइश लगायी जाएला। इण रो उद्घाटन केन्द्रीय मंत्री अर्जुनराम मेघवाल करेला। ई दौरान स्वच्छता अभियान, सांस्कृतिक आयोजन अर न्यारी-न्यारी होड़ां व्हेला।

000

देश मांय 25 लाख ऊं बत्ती लोगां आपरो डिजिटल जीवन प्रमाण पत्र बणावण सारू **चेहरा पहचान प्रणाली-फेस ऑथेंटिकेशन** अपणाई है। केन्द्रीय कार्मिक, लोक शिकायत अर पेंशन राज्य मंत्री डॉ. जितेंद्र सिंह बतायो के ई पहल ने मंगोलिया अर मालदीव समेत कई देशां सराया है। आज नुवी दिल्ली मांय चौथा राष्ट्रव्यापी डिजिटल जीवन प्रमाण पत्र अभियान रे सरुआती मौके डॉ. सिंह बतायो के ओ अभियान ई महीना रा आखिर ताई चालेला। श्री सिंह ई अभियान मांय एक पोथी अर लघु फिल्म रो विमोचन ई कर्यो।

000

राष्ट्र गीत वंदे मातरम री 150वीं वर्षगांठ रे मौके भारतीय जनता पार्टी री कानी ऊं 7 नवम्बर ने देश भर मांय 150 ठोड़ां माथे खास कार्यक्रम व्हेला। आज नुवी दिल्ली मांय भाजपा रा राष्ट्रीय महासचिव तरुण चुघ आ जाणकारी देवता बतायो के पार्टी ई महीना री 26 तारीख ने मनाया जावण वाळा संविधान दिवस ताई न्यारी न्यारी ठोड़ां वंदे मातरम गायन कार्यक्रम आयोजित करेला। अठी ने, प्रदेशभर मांय ई सिलसिला मांय 9 ऊं 15 नवम्बर ताई कई कार्यक्रम व्हेला। ई दौरान सगळा शैक्षणिक संस्थानां, एनसीसी, एनएसएस अर सामाजिक संगठनां री घणी भागीदारी तैय करी जावे। राज्य थर रो खास कार्यक्रम जयपुर रा एस.एम.एस. स्टेडियम मांय 7 नवम्बर ने राख्थी ज्यो है। इण शानदार आयोजन मांय सामूहिक 'वंदे मातरम्' गायन व्हेला अर 50 हजार तिरंगा झंडां बांट्या जाएला। ई दौरान स्वाधीनता आंदोलन रा महापुरुषां माथे नुमाइश ई लगायी जाएला।

000

लौहपुरुष सरदार वल्लभभाई पटेल री डेढ़ सौवीं जयंती अर आदिवासी क्रांतिकारी भगवान बिरसा मुंडा री 150वीं जयंती रे मौके प्रदेशभर मांय न्यारा न्यारा कार्यक्रम आयोजित कर्या जावे। ई कड़ी मांय सवाईमाधोपुर रा पीजी कॉलेज मांय माय युवा भारत अभियान रे तैत निबंध अर भाषण होड व्ही। ई दौरान राष्ट्रपति द्रौपदी मुर्मू रा व्याख्यान रो पठन ई करी ज्यो। सिरोही जिला रा शिवगंज मांय यूनिटी मार्च निकाली ज्यो। पैदल मार्च मांय राज्यमंत्री ओटाराम देवासी अर सांसद लुंबाराम चौधरी समेत घणी तादाद मांय लोग भेळा व्हीया।

000

सिक्ख पंथ रा संस्थापक गुरु नानक देव जी रो 556 वों प्रकाश पर्व आज धार्मिक उमाव रे साथे मनायो जावे। साल 1469 मांय कार्तिक महीना री पूर्णिमा रे दिन ननकाना साहिब मांय गुरु नानक जी रो जनम व्हीयो हो। वां रो जीवन, ईमानदारी, दयालुता अर लोगां री मदद रा महत्व ने दरसावे है। वां री शिक्षावां उण वगत री सामाजिक समस्यावां जिण मांय जाति बन्दोवस्त रे खिलाफ ही अर सगळा ने बरोबरी माथे जोर देवे ही। गुरु नानक जयंती माथे प्रदेशभर मांय सिक्ख पंथ रा लोगां अर पंजाबी समुदाय मांय उमाव देखी ज्यो। राजधानी जयपुर समेत न्यारा न्यारा जिलां रा गुरुद्वारां ने मोहवणा सजायी ज्यो है। शबद कीर्तन अर लंगर प्रसादी रे साथे गुरुवाणी रा पाठ व्ह रियो है। म्हारा श्रीगंगानगर खबरनवीस बतायो के वटै गुरुद्वारां मांय सेवादारां री भीड़ देखी जावे।

000

गुरु नानक देव जी रा प्रकाश पर्व रे मौके केन्द्रीय मंत्री गजेन्द्र सिंह शेखावत जोधपुर मांय गुरुद्वारा श्री गुरु सिंह सभा मांय अरदास मांय हिस्सो लियो अर सेवादारी करी। वणा कयो के गुरु नानक देव जी रो जीवन आपां ने मानवता, सेवा अर सत्य रा मारग माथे चालण री सीख देवे है।

000

कार्तिक पूर्णिमा अर देव दिवाळी रे मौके आज प्रदेशभर मांय धार्मिक उमाव रो माहौल बण्यो रियो। पुष्कर, कोलायत, बेणेश्वर धाम अर गलता तीर्थ समेत सगळा खास सरोवरां माथे पवित्र स्नान सारू संवारा ऊं ई श्रद्धालुआं रो तांतो लाग्यो रियो। कार्तिक पूर्णिमा रे मौके पंचतीर्थ स्नान रे साथे ई पुष्कर मांय भरीज रियो सालाना मेळो ई विधि पूरण सम्पूर्ण व्हीयो। म्हाणी अजमेर खबरनवीस बतायो के देश-विदेश ऊं आया दो लाख ऊं बत्ती सिरधालुआं पुष्कर रा 52 घाटां माथे डुबकी लगार पुण्य अर्जन कर्यो।

.000

सवाईमाधोपुर मांय रामेश्वर घाट रा त्रिवेणी संगम मांय ई घणी तादाद मां लोग धार्मिक स्नान सारू पूग्या। वठे संगम मांय डुबकी लगार चतुर्भुज नाथ रा दर्शन ने लेर मिन्दरा मांय लाम्बी कतार देखी ज्यी। पाली मांय ई मौके गायां ने रीत मुजब लापसी अर गुड़ खिलार पूजा करी। वटै ई देव दीवाळी रे मौके मन्दिरां अर घरां मांय दीपमालावां सजायी जावे। देव दिवाळी ने देवतावां री दीवाळी मानी जावे है अर दिया जगार देवतावां रे

धरती माथे आवण री खुशियां मनायी जावे है। ई मौके केई पवित्र सरोवरां माथे दीपदान रा कार्यक्रम राख्यी ज्या है। डूंगरपुर मांय सापन नदी रे किनारे प्राचीन नीलकंठ महादेव मंदिर मांय आज ऊं तीन दिन रो मेळो भरीजे। मेळा मांय लोकगीतां माथे आदिवासी समुदाय रा लोगां हथियारां रे साथे नाच कर्यो। और ब्यौरो म्हारा डूंगरपुर खबरनवीस ऊं—

000

देवस्थान महकमा कानी ऊं चलाई जाए री वरिष्ठ नागरिक तीर्थ यात्रा योजना रे तैत आज बीकानेर ऊं पांच ज्योतिर्लिंगां री जातरा सारू खास रेलगाड़ी रवाना व्ही। ई रेलगाड़ी मांय बीकानेर संभाग रा जिला ऊं 705 वरिष्ठ नागरिकां ने धार्मिक जातरा कराई जाएला। विधायक जेठानंद व्यास गाड़ी ने हरी झंडी दिखा र रवाना कर्या।

000